

Swhoz Cunh Yienz Iq Minzczuz Gig Doxgiet

□ Vangz Yinz Liu Swjyenh raiz Lij Yanghlenz hoiz

Lanzgiuzcangz、aenvenz gvangj-cangz、daizheiq、laeuzgyong、faexsamoeg、faexndoeq、ywdoj、faexmakgak、mou、vaiz、gaeqdoj、byalaex…… Geij bi neix daeuj, Yungzsuij Myauzczuz Swciyen Swyungz Yangh Swhoz Cunh youq mwh haenqrengz duetgungz caeuq saenqhwnq lajmbanj yawjnaek hwnqguh giekdaej sezsih, ndaem doxgaiq ciengx doihduz yawjnaek “doiqhop dinj、daeuzhaeuj noix、ndaejcienz vaiq”, yawjnaek coicaenh ranzhenz doxndei、minzczuz doxgiet, okrengz saenqhwnq lajmbanj.

“Swhoz” Mwhnduj Miz Seiq Aen Mbanj, Buensenj Coi Doxgyau Doxyungz

Lij Swyenz boux vunzmbanj 65 bi haenx gaisau naeuz: “Mbanj dou mwhnduj faen baenz seiq aen cai, Mbanjsiujliz、Mbanjdabingz、Mbanj-dagujsanhdouz、Mbanjbanjlanjgouh, vunzlai caemhyouq gig doxgiet, ndigah heuhguh Swhoz Cunh. Dingq bangeq naeuz, vunzmbanj dou dwg 1995 nienz hainduq daj Dungdouz、Anhdai、Yungzsuij daengj yanghcin buen gvaqdaej, geij aen siujsoq minzczuz couh caeuq Bouxgun cabyouq.”

Gyaj Vwnzhingh naeuz: “Ciuhgeq dou yienzlaiz dwg 1955 nienz daeuj gizneix haifwz, 1956 nienz cij cingqsih buen daeuj. Gaxgonq cijmiz 20 lai ranz mbouj daengz bak vunz, seizneix daengx mbanj miz 102 ranz 388 vunz.” De dwg vunz Mbanjyizminz, ndaej 81 bi lo.

“Dou daj Yanghfwnj Yangh Yijbuz Cunh、Anhdai Yangh Yenzbauj Cunh caeuq Beizsiu Cunh buen daeuj, dingzlai dwg Myauzczuz. Seizhaenx gou ngamq ndaej cib lai bi, daihgaya hix cungj dwg vunznajseng. Gvaq ndaej 60 lai bi, daihgaya doxyouq baenz ranz vunz lo.” Boux vunzmbanj 81 bi haenx Liengz Sinhyungz baenzneix naeuz.

Mwhneix Swhoz Cunh bailhlaj guenj Dabingz、Siujshuh、Bingzlingz、Siujliz、Yozcauzgouh、Bazyegwngh、Yizminz、Dasuh、Sanhdouz、Banjlanj、Hojba、Gouhvej daengj 12 aen mbanj, gungh

miz 604 ranz 2719 vunz, baudaengz Bouxgun、Myauzczuz、Bouxcuengh、Dungcu、Yauzczuz、Lizsuzcu daengj minzczuz. Ndaude, Myauzczuz miz 1310 vunz, Bouxcuengh miz 80 vunz, Dungcu miz 78 vunz, Yauzczuz miz 55 vunz, Lizsuzcu miz 3 vunz.

Guhlax Canjnieb Gveihmoz, Bang Rengz Demsou Guhhoengh Lajmbanj

“Mwhneix moix ngoenz sou ndaej 1500 goenggaen makgak ndip, sou ndaej ndwen ndeu. Bineix makgak gyaqcienz baenz, dou soucawx moix goenggaen 14 maenz. Bi’ gvaq dwg moix goenggaen 6 maenz daengz 10 maenz.” Gyauz Yinghyungz youq ndawmbanj guh boux soucawx makgak ndaej lai bi, sugrox ndawmbanj makgak ndaem geijlai caeuq gyaqcienz soucawx dwg geijlai.

“Bineix ranz gou mbaet ndaej 400 lai gaen makgak ndip, gai ndaej 3000 lai maenz.” Maj Siuyinz doq youq lanzgiuzcangz dak haeux doq naeuz.

“Daengx mbanj ndaem gomakgak 1206 moux.” Swhoz Cunh Dangj Cungcihbu suhgi、Cunhminzvej cujyin Hoz Meijyenz naeuz.

Geij bi neix daeuj, Swhoz Cunh mboujdan ndaem faexsamoeg、faexndoeq baenz ndoeng baenz mbiengj, lij ndaem ywdoj、gocazyouz. Seizneix, daengx mbanj miz faexsamoeg 46665 moux, go’ ndoeq 13560 moux, gocazyouz 390 moux, gungh miz 600 ranz ndaem. Dan 2021 nienz, daengx mbanj couh fat le ciengz bangbouj canjnieb 8.896 fanh maenz, nangqdaengz 21 hoh ranzduetgungz caeuq 2 hoh ranzgamcaek.

“Vihle hawj vunzlai souhaeuj gya lai, dou liujgaij hawciengz aeuyungh, roengzrengz hwnghat ‘doiqhop dinj、daeuzhaeuj noix、ndaejcienz vaiq’ daengj hanghmoeg, daihliengh ciengx mou、ciengx vaiz、ciengx gaeq、ciengx bya. Miz le souhaeuj, vunzmbanj guh vwnzva vueddoengh engqgya lai, vunz hix engqgya doxgiet.” Hoz Meijyenz naeuz.

Vwnzva Gyaughliuz Coi Doxgiet, Giekdaej Sezsih Gig Mizrengz

“Aen vwnzyidui dou miz 20 lai vunz, cawz le miz saeh roxnaeuz fwndoeq, itbuen daihgaya cungj daeuj baizlien.” Maj Siuyinz naeuz, “daihgya gyangngoengz nyaengq guhhong, gyanghaemh 8 diemj daengz 10 diemj baizlien.”

Mbanjyizminz laeb miz daizheiq caeuq giuzcangz, gyanghaemh hai daeng ronghsagsag, ndigah gyoengqvunz ndaej youq gyanghaemh lienh cezmu. Daengx mbanj seizneix an le 60 aen daeng daiyangznwngz rongh roen. “Seizneix fuengbient lai lo, caihbieh byaij baedauq, mbouj lumj doenghbaez gyanghaemh ok dou dwk dienhdongz, lij mbouj ancienz.” Maj Siuyinz naeuz.

“Dou ciengzseiz caeuq yanghcin wnq guh vueddoengh doxgyauliuz.” Maj Siuyinz naeuz, “bineix mbanj dou bau gij saeh guh ndei fuengzre binghra q youq daih’ it, lij banh le aen vanjvei ndeu, gij cezmu biujyienj neix vunzmbanj cungj haenh ndei.”

Ciuq cam rox, daj 2016 nienz daengz mwhneix, Swhoz Cunh youq mwh guh gij hong duetgungz gunggeng, douzhaeuj 1275 fanh maenz hwnqguh 20 goengleix roen, diuz roen doeng daengz doengh gij mbanj lumjbaenz Sanhdouz、Dasuh、Banjlanj、Gouhvej、Hojba、Yizminz, bu ndei suijniz liux. Roen canjnieb bu daengz gyauej reih gyauej naz, henz roenmbanj Sanhdouz、Dabingz、Dasuh、Yizminz、Yozcauz、Gouhvej、Banjlanj、Hojba daengj mbanj gaengcang ndei daeng daiyangznwngz.

“Doenghbaez Bingzlingz、Sanhdouz、Dasuh、Banjlanj、Gouhvej、Hojba roek aen mbanj neix ndaem doxgaiq youq reihnaz, yaek daeh okbae cungj dwg aeu vunz gwed、rap, lij aeu cang ruz byaij roenraemx cijndaej, diuz roen byaij haenx hix utvan hix iq, lumj saejyiengz nei, ci gvaq mbouj ndaej, baedauq gig mbouj fuengbient, gig nanz canh ngaenz.” Hoz Meijyenz naeuz, “seizneix mbouj doengz lo. Roen moq guhbaenz, gij doxgaiq ndaw reihnaz vunzlai heih daeh okrog, cix ndeigai lai lo, mbanj dou hix hwnghat ndaej hoengh lo, bouxgunhaz hix demgya le souhaeuj.”

